



Uemadmodum planè falsum est, nec hodie demum à gravibus viris confutatum, quod *Iohannes Bodinus* sententiam de quatuor Monarchiis (de quibus tamen rectissimè dicunt Chronologi, *Quatuor monarchias esse historia columnas*) inveteratum vocat errorem ac magnorum virorum opinione pervulgatum, qui tam altè radices egerit, ut vix evelli posse videatur: ita verissimum est & gravissimum *Francisci Balduini ICTI Parisiensis* pronunciatum, quòd non modò apud *Judæos*, sed & apud *Ægyptios*, *Chaldæos*, *Persas*, *Romanos*, historiarum, tanquam rei sacrosanctæ, cura Sacerdotibus mandata fuerit, ipsiq; etiam reges & principes maximi, & doctissimi ac nobilissimi quiq; viri hanc deinde provinciam susceperint: nam neq; aliis temerè tantum permittebatur, neq; sanè cuivis licere hoc debet, adeò ut vetus quoq; *Ecclesia*, quod ex *B. Hieronymo* deduci potest, delectos suos habuerit actuarios, qui & diligenter & bonâ fide collegerunt, publicâq; autoritate suarum rerum memoriam consignaverunt. Quò magis miranda est *Bodini* contumelia, quâ *Danielem Prophetam* sanctissimum afficit, quod ipsius verba super hâc re obscura sint & ambigua, inq; varios torqueri possint sensus: in quo ei bellè quoq; convenit cum *Iohanne Calvino*, qui de libro *Apocalypseos* sententiam rogatus, nescio an urbanè magis an inurbanè seu impiè potius, respondit, *Se penitus ignorare quid velit tam obscurus scriptor, ut, qui qualisq; fuerit, inter eruditos nondum constet.*